

ARLeF: IL PROGJET “CRESSI CUN PLUI LENGHIS” AL RIVE INTAL FRIÛL OCIDENTÂL, DI VUÊ ANCJE A SAN VÎT DAL TILIMENT (PN)

Il progjet de Agenzie Regjonâl pe Lenghe Furlane “Cressi cun plui lenghis/Crescere con più lingue” pe promoziun dal bilinguism infantîl za dai prins mês di vite dai fruts, al conferme la proprie validitât e si slargje ancje tal Friûl Ocidentâl.

Di fat, vuê ai 8 di Mai dal 2017, Fieste de Mame che e vignarà celebrade uficialmentri domenie che e ven, al è stât sotscriet il Protocol di intese tra ARLeF, Comun di San Vît dal Tiliment e Aziende pai Servizis Sanitaris n. 5 “Friûl Ocidentâl”.

Par sotscrivi il document a son intervignûts li dal municipi di San Vît dal Tiliment il sindic Antonio Di Bisceglie, il president dal ARLeF Lorenzo Fabbro e il diretôr gjenerâl de ASS. n. 5 “Friûl Ocidentâl” dotôr Giorgio Simon, che al à declarât «O sin une vore contents e braurôs di podê inviâ tal nestri teritori il progjet “Cressi cun plui lenghis” parcè che o stimin di grande impuartance promovi la bielece e la ricjece dal patrimoni linguistic di cheste zone, dulà che la lenghe furlane e je part fundamentâl. In curt lu puartarin ancje a Pordenon tal ospedâl e te cjase di cure “San Giorgio”».

Il sindic Antonio Di Bisceglie al à let il Protocol di intese che al previôt azions di formazion dai operadôrs sanitaris, ativitât di informazion sul valôr dal plurilinguism pai gjenitôrs e la distribuzion a dutis lis fameis dai fruts che a nassaran intal ospedâl di San Vît de valisute “Puarte a cjase il furlan/Porta a casa il friulano” che e à dentri une vuide sui vantaçs dal bilinguism infantîl, il dvd de “Pimpa par furlan”, il bavarin “Fasimi cressi cun plui lenghis”, un simpatic metri par misurâ la cressite dal neonât par cure de ARLeF e la vuide dal Comun di San Vît dal Tiliment. Il sindic duncje al à declarât «Cheste azion e je in sintonie ad implen cul program de Aministrazion comunâl impegnade intal progjet “Nati per le Lingue” che, partint de promoziun de lenghe locâl, il furlan, si disviluparà par fasis ancje pe lenghe inglese: cognossi plui lenghis al insiore lis fameis e al vûl dî garantî fin di fruts la viertidure al mont».

Lis conclusions a son stadis lassadis al president de ARLeF Lorenzo Fabbro, che al à marcât la impuartance di “Cressi cun plui lenghis/Crescere con più lingue”. «Dopo de partence positive di cheste iniziative inte Basse Furlane e il coinvolziment sucessîf de Aziende Sanitarie dal Friûl de Alte, al è cun grande sodisfazion che la ARLeF vuê e sotscrif chest Protocol di intese ancje cul Comun di San Vît dal Tiliment e la ASS. N. 5 dal Friûl Ocidentâl, un teritori strategjic pe politiche linguistiche regjonâl. Favorî il bilinguism infantîl fin de fasce di etât 0-3 agns e je une azion fundamentâl sedi par garantî un avignî ae lenghe furlane sedi par dâ a ducj i neonâts une oportunitât in plui di disvilup, ancje a nivel neurolinguistic. Chest progjet al è tra chei che la ARLeF e calcole di plui grande impuartance e cualitât, sedi pal coinvolziment di esperts scientifics di caratar internazionâl inte sô realizazion, sedi pal preseament vût sul teritori e - come buine pratiche - a nivel european. O vin agrât al Comun di San Vît dal Tiliment e ae ASS. n.5 dal Friûl Ocidentâl par vê condividût in toto e in timps une vore svelts chest Protocol di intese».

A jerin presints ancje il vicesindic Federica Fogolin e i assessôrs Carlo Candido e Susi Centis, il segretari gjenerâl dal comun di San Vît dal Tiliment dot. Loris Grando e i rappresentants dal

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / e-mail: arlef@caltpr.it

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<

personâl de ASS. n.5 “Friûl Ocidentâl”: il primari dot. Michele Vanin, la dotore Annamaria Valcic e altris operadôrs dal ospedâl di San Vîl dal Tiliment, il dotôr Rosario Sisto incjariât dal diretôr gjenerâl tant che referent de Aziende ospedaliere “Dipartiment materni infantîl” par viodi dal proget “Cressi cun plui lenghis”: de bande di ducj, condivison e preseament pal inviament di chest proget ancje intal teritori dal Friûl Ocidentâl.

Udin, ai 8 di Mai dal 2017

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<